

confluente et ad medium limbi extensa pallescente. Pectus et abdomen flava, illud hic illic virescens. Pedes colore corporis, subtiliter nigro-pubescentes, femoribus dense minuteque fusco-conspersis, tibiis sat longe nigro-spinulosis, tarsis articulo tertio apicem versus nigro-fusco.

14. *Macrocoleus Krueperi* REUT.

Diagnosis.: Dilute glaucescenti-canescens (♂) vel albido-flavescens (♀), sat dense nigro-hirsutus, subtus subtiliter pallido-pubescentis; antennis pedibusque nigro-pubescentibus, coxis femoribusque anticis, illis margine externo, his ad apicem marginis inferioris setis nigris, femoribus posterioribus et praesertim posticis supra ad apicem punctis fuscis notatis, tibiis nigro-spinulosis, anticis spinulis marginis interioris subtilibus et brevibus, parum distinctis; maris capite macula verticis orbitali utrinque mesosternoque saltem medio obscure ferrugineo-fuscis, feminae capite postice aurantiaco; scutello basi aurantiaco; clavo circa angulum scutellarem corioque macula obliqua in angulo apicali interiore fusco-fumatis; vertice oculo circiter $\frac{3}{4}$ vel vix duplo (♂) vel paullo magis quam duplo (♀) latiore; capite latitudini posticae longitudine aequali (♂) vel hac paullo longiore (♀); rostro medium ventris attingente vel sub-superante; antennis maris robustis. Long. ♂ ♀ $3\frac{3}{5}$ — $3\frac{4}{5}$ mm.

Hab. in Algeria (Oran!), DD. PUTON et LETHIERRY; Syria!, D. Dr KRUEPER.

Descr.: *M. molliculo* FALL. primo intuitu paullulum similis, ab hoc ut a speciebus reliquis tamen mox distinguendus. Corpus dilute glaucescenti-canescens (♂) vel albido-flavescens (♀), supra sat dense nigro-pilosum. Caput pronoto paullulum longius et ejus latitudine postica circiter $\frac{2}{5}$ angustius, apicem versus sat productum, a latere visum clypei latitudine altitudinem longitudine superans, angulo faciali minus fortiter acuto, gula circiter dimidium capitis longitudinem occupante, dilute glauco-canescens vel flavescens, nigro-hirsutum, vertice utrinque macula vel stria transversa orbitali obscure fusca, saepe magis minusve late ferrugineo-cincta (♂) vel postice fronteque lateribus aurantiacis (♀); clypeo basi interdum utrinque puncto fusco; vertice oculo $\frac{3}{4}$ vel vix duplo latiore. Oculi fusci, maris in genas longius extensi et orbita interiore subsinuati, feminae breviores. Rostrum medium ventris attingens, apicem versus ferrugineum, apice piceo-nigro, articulo primo medium xyphi attingente. Antennae maris robustae, feminae graciles, corpori concolores, dense nigro-pubescentes, articulis duobus ultimis simul sumtis secundo paullulum longioribus, hoc latitudine pronoti basali circiter $\frac{1}{4}$ brevioribus; articulo primo annulo basali fuscescente, basi pone hunc albida, articulatione articuli secundi albida, in extrema basi nigro-annulata, his signaturis in ♀ obsoletis et multo pallidioribus. Pronotum basi longitudine duplo latius et apice longitudini latitudine aequali, lateribus rectis, disco parum (♂) vel satis (♀) declivi; glauco-canescens vel albo-flavescens, nigro-hirsutum, callis saepe anguste fusco-terminatis, interdum dilute ochraceis. Scutellum glauco-canescens vel albo-flavescens, nigro-hirsutum, basi